

JILID

1



MENINJAU PEMIKIRAN
**USTAZ AHMAD
SONHADJI** MOHAMAD
MILATU

Daripada Khutbah-Khutbah Karangannya

MOHAMED QUSAIRY THAHA · MUHAMMAD HANIFF HASSAN · MUSTAZAH BAHARI

KENALI ALMARHUM USTAZ AHMAD SONHADJI DARI KHUTBAH-KHUTBAHNYA¹

Khutbah-khutbah tulisan Almarhum Ustaz Ahmad Sonhadji bukan hanya mengandungi ilmu agama bagi memandu hidup seorang Muslim tapi ia juga mengandungi maklumat-maklumat tersembunyi tentang keperibadian dirinya. Maka mengenali Almarhum bukan hanya dilakukan dengan meneliti sejarah hidupnya, tapi juga melalui idea-idea beliau yang terakam dalam karya-karyanya, seperti kumpulan khutbah ini.

Pelbagai rumusan dan dapatan boleh dibuat dengan menganalisa kumpulan khutbah ini tentang diri Almarhum tergantung pada daya dan upaya analisa seorang pengkaji.

Di sini, beberapa rumusan mengenai Almarhum dapat dikongsikan dengan perakuan bahawa rumusan-rumusan ini bukanlah sesuatu yang absolut tentang diri beliau kerana ia hanya berdasarkan pada khutbah-khutbah yang merupakan hanya segelintir daripada ilmu dan karya beliau. Namun, rumusan-rumusan ini tetap berguna bagi mengenali Almarhum dan sebagai sandaran bagi sesiapa yang ingin mengkaji tentang beliau.

SEORANG TRADISIONALIS

Dari kandungan khutbah-khutbah Almarhum dapat dirumuskan bahawa beliau, pada dasar dan inti patinya, adalah seorang tradisionalis dalam fahaman dan amalan Islamnya. Yang dimaksudkan dengan tradisionalis di sini ialah fahaman dan amalan agama yang berdasarkan warisan umat Islam di rantau ini, iaitu yang bermazhab Shafi'ii dalam fiqh, Ash'ari dalam akidah Ahli Sunnah Wal Jamaah, di samping iltizamnya pada tradisi ilmu ulama silam dari aliran yang sama. Sebagai manusia, pastinya Almarhum mempunyai warna-warna atau kecenderungan yang lain dalam diri. Namun sifat tradisionalis adalah sifat dominan bagi fahaman agama Almarhum. Bagi menjelaskan perkara ini, boleh dikatakan bahawa

¹ Bab ini adalah sumbangan Muhammad Haniff Hassan.

fahaman agama Almarhum bukan dari aliran modenis seperti yang dikenali pada gerakan Muhammadiyah dan pengasasnya Kiai Ahmad Dahlan dan tokohnya yang lain, Hamka. Beliau bukan dari kalangan haraki, iaitu mereka yang banyak dipengaruhi oleh idea-idea gerakan dakwah Ikhwanul Muslimin yang diasaskan di Mesir. Beliau juga bukan dari aliran Salafi-Wahabi yang banyak dipengaruhi oleh pemikiran Sheikh Muhammad bin Abdul Wahab dari Arab Saudi.

Hal ini dapat dilihat daripada perkara-perkara berikut yang didapati dalam khutbah-khutbah beliau;

- dalam memaknakan takwa dengan erti takut kepada Allah ta'ala dalam hampir semua teks khutbahnya – satu kefahaman yang berleluasa dalam kalangan agamawan di sini, walaupun secara bahasa takwa bukan bermaksud takut, tapi perlakuan melaksanakan perintah dan menjauhi larangan Allah ta'ala.²
- dalam soal hukum puasa dan membayar fidyah.³
- dalam soal hukum zakat.⁴
- dalam soal hukum mengharamkan perkahwinan lelaki bukan Muslim dengan perempuan Muslim.⁵
- dalam soal hukuman ke atas orang yang tidak berpuasa.⁶
- dalam soal keharusan hukum memukul isteri yang nusyuz.⁷
- dalam soal keharusan menyambut dan memperingati Maulid Nabi SAW.⁸
- dalam soal keharusan menyambut tahun hijrah.⁹
- dalam soal hukuman potong tangan ke atas pencuri – menolak pandangan yang mengatakan ia adalah kolot.¹⁰
- dalam soal hukuman ke atas jenayah hirabah.¹¹
- dalam komentar mengenai Good Friday¹², akidah triniti agama Kristian dan sambutan Hari Krismas.¹³
- dalam soal hukum talak dan idah bagi wanita yang diceraikan dan bagi janda.¹⁴

UNSUR-UNSUR PROGRESIF DALAM PEMIKIRAN ALMARHUM

Walaupun Almarhum adalah seorang tradisionalis, beliau bukanlah seorang yang terlalu ketat dalam mengikuti tradisi hingga tidak mahu berubah atau tertutup bagi melakukan pengubahsuaian amalan agama apabila perlu, terutama jika perubahan dan pengubahsuaian itu akan mensejajarkan dirinya dengan pegangan arus utama golongan agamawan dan bersesuaian dengan keadaan.

² Lihat khutbah bertajuk Perintah Menggerjakan Puasa.

³ Ibid.

⁴ Lihat khutbah bertajuk Menunaikan Zakat Fitrah.

⁵ Lihat khutbah bertajuk Larangan Berkahwin Dengan Orang-orang Musyrik.

⁶ Lihat khutbah bertajuk Puasa Menghilangkan Bencana Syahwat Perut.

⁷ Lihat khutbah bertajuk Pengajaran Bagi Suami Terhadap Isteri Yang Nusyuz.

⁸ Lihat khutbah bertajuk Memperingati Maulid Al-Nabi SAW dan Memperingati Kelahiran Nabi SAW.

⁹ Lihat khutbah bertajuk Menyambut Tahun Baru Hijrah dan Masihi.

¹⁰ Lihat khutbah bertajuk Hukum Pencuri Dengan Kerat Tangan.

¹¹ Lihat khutbah bertajuk Balasan Orang Yang Memerangi Allah dan RasulNya.

Sifat ini dapat dilihat dari pendirian-pendirian berikut dalam khutbah-khutbah beliau;

- memberi tumpuan pada penghayatan nilai dan akhlak mulia di peringkat peribadi apabila menjelaskan konsep al-Quran sebagai panduan hidup dan perundangan yang wajib ditegakkan oleh Muslim berbanding dengan soal pelaksanaan dan penguatkuasaan aspek undang-undang jenayah sebagaimana yang difahami oleh segolongan aktivis Islam.¹⁵
- keharusan mengeluarkan zakat fitrah dengan menggunakan wang dengan bertaklid pada mazhab Hanafi sesuai dengan pendirian Muis.¹⁶
- memasukkan candu dan ganja sebagai perkara-perkara yang haram sebagai respon pada realiti pada zamannya, sedangkan asalnya ia tidak disebut dalam kitab klasik.¹⁷
- menggunakan teknologi ukur sebagai contoh bagi Malaikat mencatat amalan manusia.¹⁸
- memasukkan candu, madat dan dadah dalam tafsiran makna perkataan al-fahsyā' (perkara keji) dalam al-Quran.¹⁹
- memasukkan dapatan sains moden mengenai kandungan oksigen yang tipis di angkasa apabila mentafsirkan ayat 125, dari surah Al-An'am.²⁰
- memasukkan rasuah sebagai perkara lebih bahaya daripada ganja dan dadah, sejajar dengan sikap pemerintah Singapura.²¹
- wajib patuh pada negara selama tidak melanggar agama sedangkan beliau sedar bahawa Singapura bukan sebuah negara Islam dan diperintah pula oleh bukan Muslim.²²

Almarhum bukan hanya menyentuh masalah-masalah teras atau baku dalam agama, melalui khutbahnya beliau juga cuba memberi bimbingan mengenai isu-isu kehidupan semasa, iaitu;

- menggalakkan sikap berjimat cermat dan menjauhi boros dan pembaziran dalam kehidupan.²³
- menggalakkan masyarakat Muslim bekerja keras untuk maju dan membuat penegasan bahawa Islam menghargai kaum buruh.²⁴
- menggalakkan masyarakat Muslim bekerja dan tidak menghabiskan masa berehat pada hari Jumaat sesuai dengan realiti semasa bahawa hari Jumaat

¹² Lihat khutbah bertajuk Nabi Isa AS Tidak Dibunuh.

¹³ Lihat khutbah bertajuk Nabi Isa AS Bukanlah Tuhan.

¹⁴ Lihat khutbah bertajuk Talak Itu Hanya Dua Kali, Janda Diwajibkan Beridah dan Perempuan Yang Bercerai Hendaklah Beridah.

¹⁵ Lihat khutbah bertajuk Perhatikanlah Isi al-Quran.

¹⁶ Lihat khutbah bertajuk Menunaikan Zakat Fitrah.

¹⁷ Lihat khutbah bertajuk Menunaikan Zakat Fitrah.

¹⁸ Lihat khutbah bertajuk Bermohonlah Kepada Allah Dengan Merendahkan Diri.

¹⁹ Lihat khutbah bertajuk Setiap Manusia Mempunyai Pengiring.

²⁰ Lihat khutbah bertajuk Siapa Yang Dikehendaki Allah Supaya Terpimpin.

²¹ Lihat khutbah bertajuk Makanlah Dari Jenis Yang Baik.

²² Lihat khutbah bertajuk Kemanisan Iman.

²³ Lihat khutbah bertajuk Kebaikan Berjimat dan Keburukan Orang Yang Boros.

²⁴ Lihat khutbah bertajuk Bekerjalah Mencari Mata Pencarian.

adalah hari bekerja, berbeza dengan masyarakat Muslim di negara jiran seperti di Johor yang hanya bersebelahan dengan Singapura, yang pada ketika itu hari Jumaat adalah hari cuti umum semua.²⁵

Hal ini – kewujudan unsur kontekstualisasi fahaman dan amalan agama dan progresif dan sifat tradisionalis – bukanlah sesuatu yang aneh. Hal seperti ini wujud pada ramai golongan tradisionalis, baik pada zaman ini atau pada zaman silam. Bahkan dalam kalangan golongan yang progresif dan modenis sekali pun, biasa terdapat pendirian-pendirian yang konservatif dalam isu-isu tertentu. Hakikatnya, ia adalah sifat alami manusia, yang tidak dapat dikotakkan dengan sifat-sifat tertentu secara mutlak. Maka penentuan tentang sifat dan karakter seseorang itu berdasarkan apa yang dominan padanya sahaja. Selain itu, ia memberi amaran pada sesiapa dalam mengkaji individu agar penilaian terhadapnya bukanlah berdasarkan pada sudut-sudut tertentu sahaja, tetapi dilakukan secara holistik.

Seperti ramai dari kalangan tradisionalis yang lain, Almarhum juga menunjukkan tanda-tanda kesukaran dalam menangani pelbagai fahaman tradisi apabila berhadapan dengan cabaran semasa dan pemikiran moden. Sebagai contoh, Almarhum berpendapat bahawa kaum lelaki lebih istimewa daripada kaum perempuan kerana sifat semula jadi masing-masing. Namun, beliau juga berkata bahawa lelaki dan perempuan adalah sama di sisi Allah ta’ala.²⁶ Bahkan beliau berpendirian progresif apabila beliau menggalakkan anak perempuan bersekolah bagi mendapat pendidikan yang baik.²⁷

PEMIKIRAN ALMARHUM & REALITI HARI INI

Ada beberapa pemikiran, komentar dan sikap Almarhum dalam khutbah yang disampaikan boleh disalah faham sebagai radikal atau bermasalah kerana dianggap sebagai tidak mendokong usaha memupuk keharmonian sosial di sisi sebahagian pemimpin politik, iaitu;

- pemikiran, komentar dan sikap Almarhum mengenai sambutan Good Friday, Krismas dan akidah triniti umat Kristian
- Ini boleh dinilai sebagai masalah sebagaimana yang dapat dilihat dalam kes larangan ke atas Mufti Menk memasuki dan menyampaikan ceramah agama di Singapura kerana berpendirian bahawa haram bagi Muslim mengucapkan “Merry Christmas” kepada penganut Kristian (Muhammad Haniff dan Mustazah, 2019) dan kes seorang imam warga asing yang berdoa agar umat Islam dapat mengalahkan kaum bukan Islam yang kerananya beliau dihantar pulang ke negara asalnya (Muhammad Haniff, 2017).

²⁵ Lihat khutbah bertajuk Sembahyang Jemaah dan Jumaat,

²⁶ Lihat khutbah bertajuk Janganlah Menjadi Orang Yang Memecah belahan Agamanya.

- sikap beliau mengenai kesalahan di bawah hukuman hudud seperti mencuri dan hirabah dan takzir seperti tidak berpuasa di bulan Ramadan.

Ini boleh dinilai tidak sesuai bagi realiti Singapura yang merupakan sebuah negara sekular yang tidak menerima pelaksanaan undang-undang Islam di sini. Selain itu, ia juga boleh dinilai sebagai persetujuan, sokongan atau simpati terhadap usaha-usaha pelaksanaan syariah atau pengkanungan undang-undang jenayah Islam yang dipromosikan oleh gerakan-gerakan Islam di negara-negara Islam seperti Parti Islam SeMalaysia (Pas) dan Hizbut Tahrir Indonesia.

Dalam hal ini, para penyunting ingin memberikan nota-nota berikut bagi manfaat para pembaca.

Pertama, perlu diambil perhatian bahawa khutbah-khutbah ini ditulis dan disampaikan beberapa dekad yang lalu. Almarhum meninggal dunia pada tahun 2010. Oleh itu, tidak dapat menjelaskan isi khutbah yang ditinggalkannya sekarang ini bagi “membela diri” atau menjelaskan konteks sosial masa itu atau latar belakang dari khutbah yang disampaikan. Hal ini adalah agar ada kewaspadaan sebelum menyalahkan beliau.

Selain itu, tidak dipastikan hari ini apakah sikap terkini beliau dalam isu-isu berkenaan kerana pemikiran dan sikap seseorang berkembang dan berubah dengan perubahan masa. Tidak mustahil, jika Almarhum, masih hidup hari ini beliau mempunyai pendapat dan sikap yang berbeza.

Walaupun Almarhum mempunyai pemikiran dan sikap yang boleh dinilai bermasalah dalam konteks hari ini, tiada siapa yang mengenali beliau akan bersetuju bahawa Almarhum kerana berpemikiran dan sikap sedemikian (pada beberapa dekad dahulu) adalah anasir radikal atau tidak sihat bagi keharmonian sosial. Sebaliknya, Almarhum dikenali sebagai tokoh yang amat perihatin terhadap kehidupan harmoni antara umat Islam dan bukan Islam di negara ini dan memberi sumbangan yang aktif terhadapnya.²⁸

Penyunting (Haniff) bersaksi, semasa menuntut di Madrasah Aljunied pada tahun 1980an, bahawa Almarhumlah yang menggalakkan para pelajar menganjurkan majlis sambutan Hari Kebangsaan yang sebelum itu tidak pernah diadakan. Ia diisi dengan, antaranya, upacara penaikan bendera pada waktu pagi dan menyanyikan lagu kebangsaan beramai-ramai. Bahkan beliau memarahi para pelajar yang tidak bersungguh-sungguh melukukannya.

Berkaitan dengan pemikiran dan sikap beliau mengenai hukuman jenayah Islam seperti hudud dan takzir, penyunting (Muhammad Haniff) juga bersaksi bahawa Almarhum, selaku salah seorang anggota Majlis Masyayikh Pergas,

²⁸ Lihat biografi ringkas Almarhum dalam buku ini dan penglibatan dan penghargaan yang diterima beliau diperingkat kebangsaan dalam Nurhaizatul Jamila Jamil, “Ustaz Ahmad Sonhadji Mohamad Milatu”, Singapore Infopedia, di http://eresources.nlb.gov.sg/infopedia/articles/SIP_1468_2010-08-13.html

kerap hadir di majlis pembentangan dan perbincangan draf kertas kajian yang di dalamnya terkandung pendirian Pergas mengenai isu hudud dalam konteks Singapura bersama anggota-anggota Majlis Tertinggi Pergas pada tahun 2003 sebelum dibentangkan pada Konvensyen Ulama pertama pada tahun itu dan kemudiannya diterbitkan pula sebagai buku Kesederhanaan Dalam Islam Dalam Konteks Masyarakat Muslim Singapura (Pergas, 2004). Semasa sesi perbincangan, Almarhum tanpa ragu-ragu bersetuju dan menyatakan sokongan pada sikap yang perlu diambil oleh Pergas untuk disampaikan kepada masyarakat umum, iaitu: "Hudud Dalam Konteks Singapura".

Walau bagaimanapun, perlulah difahami bahawa hukum hudud juga adalah hanya sebahagian daripada banyak kewajiban agama yang perlu ditunaikan oleh umat Islam. Oleh itu, perlulah diperhatikan urutan keutamaan-keutamaan kewajiban yang perlu dipenuhi mengikut keadaan sesuatu tempat dan masa. Dalam konteks inilah masyarakat Islam Singapura yang hidup sebagai kelompok minoriti melihat isu hukum hudud iaitu walaupun kita beriman dengannya, tetapi kita mempunyai realiti dan keutamaan yang berbeza berbanding dengan umat Islam yang lain.

Sebagaimana yang telah dinyatakan dalam perbincangan mengenai Sekularisme, keutamaan kita dalam konteks Singapura adalah untuk memelihara suasana bebas dan aman bagi mengamalkan tuntutan agama yang daruri atas semangat demokrasi dan menyemarakkan persekitaran masyarakat madani (civil society).

Walaupun kita dituntut menegakkannya tetapi ketidakupayaan kita untuk melakukannya tidak bermakna kelslaman atau martabat kita lebih rendah daripada umat Islam yang lain di sisi Allah ta'ala kerana kita dituntut untuk berusaha mengikut keterbatasan yang ada.

Allah ta'ala berfirman:

"Allah tidak membebankan sesuatu jiwa kecuali mengikut keupayaannya." (Al-Baqarah: 286)

Kita menolak persepsi bahawa dengan meyakini pensyariatan hudud dan beriman dengannya semata-mata menjatuhkan seseorang ke dalam lingkungan pelampauan atau berkecenderungan untuk melampau. Kita berpendapat bahawa perlulah dibezakan antara iman dan keyakinan dengan pengamalan. Dalam hal ini, kita mengakui pentingnya mengontekstualkan keyakinan dengan realiti."

Maka dalam hal ini, khutbah yang mengandungi pemikiran dan sikap Almarhum berkaitan isu yang dibincangkan di atas yang diterbitkan dalam buku ini hanyalah bagi mendokumentasi bahan sejarah. Sikap yang perlu dijadikan pegangan masyarakat Muslim Singapura dalam isu ini ialah sikap yang diambil oleh Pergas dalam bukunya kerana itulah sikap yang juga dipersetujui oleh Almarhum dan yang mewakili kalangan asatizah dan ulama setempat pada masa ini.

Namun perkara ini juga memberi beberapa pengajaran kepada para pembaca bahawa seseorang itu mungkin mempunyai beberapa pendapat yang konservatif atau tidak kontekstual, tapi bukan bermakna ia seorang yang boleh dihukumkan sedemikian atau radikal atau dinilai sebagai elemen tidak sihat dalam konteks kehidupan di Singapura kerana sikap yang adil dan saksama ialah untuk menilai beliau secara menyeluruh. Jika dia dalam kebanyakan isu berpendirian yang kontekstual atau progresif, maka kewujudan pendirian yang berbeza dalam hanya beberapa isu sahaja adalah sesuatu yang lumrah sebagai manusia.